

Visoki predstavnik se obratio Vijeću za opće poslove Evropske Unije

Visoki predstavnik, Wolfgang Petritsch, se jučer u Briselu obratio ministrima vanjskih poslova EU, na sastanku Vijeća za opće poslove Evropske Unije. Visoki predstavnik je naglasio činjenicu da je u protekle tri godine Bosna i Hercegovina postigla napredak i da je ustanovljen osnovni - ali čvrst - temelj za izgradnju funkcionalne i stabilne države Bosne i Hercegovine, koja će biti sposobna da izvršava svoje obaveze kako prema sopstvenim građanima, tako i na međunarodnom planu. Visoki predstavnik pozvao je ministre vanjskih poslova EU da Bosnu i Hercegovinu uključe u svoje aktivnosti i da joj pruže jasne i ostvarljive praktične perspektive kao partner koji je istovremeno spreman da pruži pomoć, ali je i zahtjevan.

Tokom svoje posjete Briselu Visoki predstavnik se sastao i austrijskom ministricom vanjskih poslova, Benitom Ferrero-Waldner, hrvatskim ministrom vanjskih poslova, Toninom Piculom, i Specijalnim koordinatorom Pakta za stabilnost, Erhardom Busekom, te ih obavijestio o trenutnoj situaciji u BiH.

U svom govoru Visoki predstavnik je obavijestio ministre vanjskih poslova EU o napretku koji je postignut u posljednje vrijeme u oblasti povratka izbjeglica i implementacije imovinskih zakona, ekonomske reforme i konsolidacije institucija. Visoki predstavnik je rekao da više od 92.000 manjinskih povrataka koji su registrirani u toku 2001. godine predstavljaju konačni dokaz da kreatori etničkog čišćenja nisu ostvarili svoj cilj. On je ponovio da se Bosna i Hercegovina još uvijek suočava s velikim izazovima, prije svega s izazovom implementacije Odluke Ustavnog suda o konstitutivnosti sva tri

naroda. Reforma entitetskih Ustava biti će istinski test koji će dati odgovor na pitanje da li će Bosna i Hercegovina izrasti u državu čije su opredjeljenje ljudska prava i vladavina zakona. S obzirom da su reforme Ustava u svojoj suštini pitanje "preuzimanja odgovornosti", one predstavljaju obavezu koju lokalni političari moraju ispuniti, kao i priliku koju moraju iskoristiti. Samo putem pronalaženja "unutrašnje ravnoteže zasnovane na međuzavisnosti svih zajednica", Bosna i Hercegovina može nadoknaditi propušteno vrijeme i približiti se Evropi, rekao je Visoki predstavnik.

Visoki predstavnik je još jednom istakao potrebu za hitnim hapšenjem Radovana Karadžića i Ratka Mladića i njihovim izvođenjem pred Međunarodni haški tribunal za ratne zločine. "Milošević je u Hagu. Karadžić i Mladić mu se moraju pridružiti – odmah!" rekao je Visoki predstavnik u svom obraćanju Vijeću za opće poslove.

Visoki predstavnik je pozdravio angažman EU u okviru policijske misije koja će početkom 2003. godine preuzeti zadaću IPTF-a. On je napomenuo da ova misija predstavlja priliku za afirmaciju namjere Evropske Unije da bude vodeći politički faktor i potiče strukturalne reforme koje su ključne za proces evropeizacije BiH. Visoki predstavnik je upozorio da, ukoliko se problemi BiH ne riješe, nema nikakve sumnje da će ti problemi biti "izvezeni" u ostale evropske države.

Visoki predstavnik je takođe obavijestio ministre vanjskih poslova da će sa dužnosti otići krajem maja ove godine. Predsjedništvo Evropske Unije se zahvalilo Visokom predstavniku na upješno obavljenom poslu i izrazilo svoju spremnost da nastavi s pružanjem pune podrške do isteka njegovog mandata.

Na sastanku sa specijalnim koordinatorom Pakta za stabilnost,

gospodinom Erhardom Busekom, Visoki predstavnik je razgovarao o doprinosu Bosne i Hercegovine regionalnoj saradnji na Balkanu.